

Gwiôzdkò z niebów

Gwiôzdkò z mòji gminë nieba
Dôjkôj nama bëlné drodżi
Cobë ni mùszôł wcyg wòłac
Za àutowim tejlã drodżim...

Gwiôzdkò z kaszëbsczégò nieba
Wrócë w chëcze najã mòwã
Bë ni leno w dobrëch szkòłach -
Le we familiach królowa...

Gwiôzdkò z biédny Pòlsczi nieba
Co w òchëbie a niezgarze
Mni pòdatków, wicy chleba
Niech sã nóm, robòcym darzi...

Gwiôzdkò, të z Brukselë nieba
Dôj ùrzãdnikóm òdpòcznąc
Niech przestóną w prawie grzebac
A sã lepi dobrze wëspią...

Gwiôzdkò z Americzi nieba
Co sã wcyskô, dze le plac je
Rzeczôj, że ju nie trzeba
Jich przesniti demòkracje...

Gwiôzdkò z nôwëższégò nieba
Co na pargù sedzysz zberkù
Wëswiécë nóm na ne Gòdë
Trójno zdrowiô a ùbëtkù...

Tómk Fópka, Lëzëno, 13 gòdnika 2018 rokù, gòdz. 17.18